

彙書

武英殿聚珍版本

同治乙丑七月得于越城
倉橋書肆 恣伯記

蠻書目錄

武英殿聚珍版原

卷一

雲南界內途程第一

卷二

山川江源第二

卷三

六詔第三

卷四

名類第四

卷五



六驗第五

卷六

雲南城鎮第六

卷七

雲南管內物產第七

卷八

蠻夷風俗第八

卷九

南蠻條教第九

卷十

南蠻疆界接連諸番夷國名第十

臣等謹案蠻書十卷唐安南從事樊綽撰新唐

書藝文志著於錄宋史藝文志則有綽所撰雲

南志十卷而不稱蠻書永樂大典又題作雲南

史記名目錯異今攷司馬光通鑑攷異程大昌

禹貢圖蔡沈書集傳所引蠻書之文並與是編

相同則新唐書志為可信惟志稱綽為嶺南西

道節度使蔡襲從事而通鑑載襲實官安南經

略使與綽所記較合是新書亦失攷也綽成此

書在懿宗咸通初書中多自稱臣又稱錄六詔

始末纂成十卷於安南郡州江口附張守忠進
獻蓋當時嘗以奏御者交州境接南詔綽爲幕
僚親見蠻事故於六詔種族風俗山川道里及
前後措置始末撰次極詳實輿志中最古之本
宋祁作新史南蠻傳司馬光通鑑載南詔事多
採用之程大昌等復引所述蘭滄江以證華陽
黑水之說蓋宋時甚重其書而自明以來流傳
遂絕雖以博雅如楊慎亦稱綽所撰爲有錄無
書則其亡軼固已久矣今此本因錄入永樂大
典僅存而文字已多斷爛不可讀又世無別本

可校謹以諸書參攷旁證正其訛誤而姑闕其
不可通者各加案語疏於下方釐爲十卷仍依
新唐書志題曰蠻書從其朔也乾隆三十九年
二月恭校上

蠻書目錄

蠻書卷第一

唐

樊

綽

撰

雲南界內途程第一

安寧城後漢元鼎二年伏波將軍馬援立銅柱定疆界

之所

案馬援定交趾為後漢光武帝建武十九年事元鼎乃西漢武帝紀年後漢並無此號蓋樊綽失於

攷據

去交趾城池四十八日程漢時城壁尙存碑銘並

在

苴咩

上音斜下符差切

城從安南府城至蠻王見坐苴咩城水

陸五十二日程只計日無里數從安南上水至峰州兩

日至登州兩日至忠誠州三日至多利州兩日至奇富

州兩日至甘棠州兩日至下步三日至黎武賁柵四日
至賈勇步五日已上二十五日程並是水路大中初悉
屬安南管係其刺史並委首領勾當大中八年經略使
苛暴川洞離心疆內首領旋被蠻賊誘引數處陷在賊
中從賈勇步登陸至矣符管一日從矣符管至曲烏館
一日至思下館一日至沙隻館一日至南場館一日至
曲江館一日至通海城一日至江川縣一日至進寧館
一日至鄯闡柘東城一日案柘東舊唐書及通鑑俱作
拓東胡三省云言開拓東境
也新唐書作柘
从木與此同從柘東節度城至寧寔館一日安寧館
本是漢寧郡城也從安寧城至龍和館一日至沙雌館

一日至曲館一日至沙卻館一日至求贈館一日至雲

南驛一日至波大驛一日至白巖驛一日至龍尾城一

日李謐伐蠻於龍尾城誤陷軍二十萬衆今爲萬人塚

至陽

案陽新唐
書作羊

苴咩城一日

蠻王從大和城移在苴咩
城案蠻王至咩城十一

字原本誤入
正文今改正

自西川成都府至雲南蠻王府州縣館驛

江嶺開塞並里數計二千七百二十里

從府城至雙流縣二江驛四十里至蜀州新津縣三江

驛四十里至延貢驛四十里至臨邛驛四十里至順城

驛五十里至雅州百丈驛四十里至名山縣順陽驛四

十里至巖道縣延化驛四十里從延化驛六十里至管

長賁關從奉義驛至雅州界榮經縣南道驛七十五里

至漢昌六十里案此句上屬雅州地名葛店至皮店三

十里至黎州潘倉驛五十里至黎武城六十里至白土

驛三十五里過漢源縣十里至通望縣木笕驛四十里去大渡

至望星驛四十五里至清溪關五十里至大定城六十

里至達士驛五十里黎嵩二州分界至新安城三十里至菁口

驛六十里至榮水驛八十里至初裏驛三十五里至臺

登城平樂驛四十里古縣今廢至蘇邗驛四十里古縣至嵩州

三阜城四十里州城在三阜山上至沙也城八十里故嵩州大和年移在

登臺至儉浪驛八十里至俄淮嶺七十里下此嶺入雲南

界已上三十二驛計一千八百八十里案上文惟三十九十五里與此數不符並屬西川管差官人將軍專知驛務

雲南蠻界從嵩州俄淮嶺七十里至菁口驛三十里至

芑驛六十里至會川鎮差蠻三人充鎮五十五里至目

集館七十里至會川有蠻充刺史稱會川都督從目集

驛至河子鎮七十里瀘江乘皮船渡瀘水從河子鎮至

末柵館五十里至伽毗館七十里至清渠鋪八十里渡

繩橋雲南行記云渠桑驛至藏傍館七十四里至陽褒館六十里

過大嶺險峻極從陽褒至弄棟城七十里本是姚州舊

屬西川天寶九載為姚州都督張乾案乾唐書作虔陀附蠻所

陷從弄棟城至外彌蕩八十里從外彌蕩至求贈館此案
句下有至雲南城七十里至波大驛四十里至渠藍趙
脫文館四十里至龍尾城三十里從龍尾城至陽苴咩城五
十里以上一十九驛計一千五十四里案十九驛共計
亦與此數不符

南蠻因姚州之後屬蠻管係從邕州路至蠻苴咩城
從黔州路至蠻苴咩城兩地途程臣未諳委伏乞下
堂帖令分析緣南蠻姦猾攻劫在心田桑之餘便習
鬪敵若不四面征戰凶惡難俊所以錄其城鎮川原
塵黷宸辰或冀破其蟻聚之衆永清羌虜之夷臣披

瀝懇忱無任隕越之至案此條乃附載陳說之詞如
後世著書之案語原本誤連

正文遂令文義格碍今
低一格以別之後倣此

從石門外出魯望昆川至雲南謂之北路黎州清溪關
出邛部過會通至雲南謂之南路從戎州南十日程至
石門上有隋初刊記處云開皇五年十月二十五日兼
法曹黃榮領始益二州石匠鑿石四孔各深一丈造偏
梁橋閣通越析州津州蓋史萬歲南征出于此也越析
州今西河河東一日程越析州諮長故地也津州未詳
其處天寶中鮮于仲通南溪下兵亦是此路後遂閉絕
僅五十年來貞元十年南詔立功歸化朝廷發使冊命

而邛部舊路方有兆吐蕃侵鈔隔關其年七月西川節度韋臯乃遣巡官監察御史馬益閉石門路量行館石門東崖石壁直上萬仞下臨朱提江流又下入地中數百尺惟聞水聲人不可到西崖亦是石壁倚崖亦有閣路橫闊一步斜亘三十餘里半壁架空欹危虛險其安梁石孔卽隋朝所鑿也閣外至夔嶺七日程直經朱提江下上躋攀偃身側足又有黃蠅飛蛭毒蛇短狐沙虱之類石門外第三程至牛頭山山有諸葛古城館臨水名馬安渡上源從阿等路部落遶蒙夔山又東折與朱提江合第五程至生蠻阿部落第七程至蒙夔嶺嶺當

大漏天直上二十里積陰凝閉晝夜不分從此嶺頭南下八九里青松白草川路漸平第九程至魯望卽蠻漢兩界舊曲靖之地也曲州靖州廢城及邱墓碑闕皆在依山有阿竿路部落過魯望第七程至竹子嶺嶺東有暴蠻部落嶺西有盧鹿蠻部落第六程至生蠻磨彌殿部落此等部落皆東爨烏蠻也男則髮髻女則散髮見人無禮節拜跪三譯四譯乃與華通大部落則有鬼主百家二百牛馬案此句未詳無布帛男女悉披牛羊皮第九程至制長館于是始有門閣解宇迎候供養之禮皆漢地凡從魯望行十二程方始到柘東

黎州南一百三十里有清溪峽乾元二年置關關外三十里卽巋州界也行三百五十里至邛部川故邛部縣之地也下南一百三十里至臺登西南八十里至普安城劍南西川節度使重兵大將鎮焉臺登直北去保塞城八十里吐蕃謂之北谷天寶以前巋州柳強鎮也自入吐蕃更增修險因城下有路向曩恭地谷東南一百三十里至羅山城天寶以後吐蕃新築非國家舊城貞元十年十月西川節度兵馬與雲南軍併力破保塞大定獻俘闕下十一年正月西川又拔羅山置兵固守邛南驛路由此遂通臺登城直西有西望川行一百五十

里入曲羅瀘水從北來至曲羅縈迴三曲每中間皆有磨些部落以其負阻深險承上莫能攻討

案承上蠻官名見後文

瀘水從曲羅南經劍山之西又南至會同川邊水左右總謂之西蠻邛部東南三百五十里至勿鄧部落大鬼主夢衝地方闊千里邛部一姓白蠻五姓烏蠻初止五姓在邛部臺登中間皆烏蠻也婦人以黑繒爲衣其長曳地又東欽兩姓在北谷皆白蠻三姓皆屬夢衝內受恩賞于國外私于吐蕃貞元七年節度使韋臯使巋州刺史蘇隗殺夢衝因別立大鬼主勿鄧南七十里

有兩姓部落

案此下當有關文

蠻書卷第一

蠻書卷第二

唐

樊

綽

撰

山川江源第二

金馬山在柘東城螺山南二十餘里高百餘丈與碧雞山東南西北相對土俗傳云昔有金馬往往出見山上亦有神祠從漢界入蠻路出此山之下螺山徧地悉是螺蛤故以名焉

碧雞山在昆池西岸上與柘東城隔水相對從東來者岡頭數十里已見此山山勢特秀池水清澹水中有碧雞山石山有洞庭樹年月久遠空有餘本

玷蒼山

案玷唐書作點

南自石橋北抵登川長一百五十餘里

名爲玷蒼直南北亦不甚正東向洱河城郭邑居碁布山底西面陡絕下臨平川山頂高數千餘丈石稜青蒼不通人路冬中有時墮雪

囊葱山在西洱河東隅河流俯齧山根土山無樹石高處不過數十丈面對賓居越析山下有路從渠斂趙出登川

高黎共山在永昌西下臨怒江左右平川謂之穹賧湯浪加萌所居也草木不枯有瘴氣自永昌之越賧途經此山一驛在山之半一驛在山之巔朝濟怒江登山暮

方到山頂冬中山上積雪苦寒秋夏又苦穹賧湯浪毒暑酷熱河賧賈客在尋傳羈離未還者爲之謠曰冬時欲歸來高黎共上雪秋夏欲歸來無那穹賧熱春時欲歸來平中絡賧絕

絡賧財之名也

大雪山在永昌西北從騰充過寶山城又過金寶城以北大賧周迴百餘里悉皆野蠻無君長也地有瘴毒河賧人至彼中瘴者十有八九死閻羅鳳嘗使領軍將於大賧中築城管制野蠻不逾周歲死者過半遂罷棄不復往來其山上肥沃種瓜瓠長丈餘冬瓜亦然皆三尺圍又多薏苡無農桑收此充糧三面皆占大雪山其高

處造天往往有吐蕃至賧貨易云此山有路去贊普牙帳不遠

又有水源出臺登山南流過雋州西南至會州諾賧與東瀘古諾水也源出蕃中節度北謂之諾矣江南郎部落又東折流至尋傳部落與磨些江合源出吐蕃中節度西共籠川犛牛石下故謂之犛牛河環遶弄視川南流過鐵橋上下磨些部落卽謂之磨些江至尋傳與東瀘水合東北過會同川總名瀘水蜀忠武侯諸葛亮伐南蠻五月渡瀘水處在弄棟城北今謂之南瀘兩岸葭大如臂脰川中氣候常熱雖至冬行過者皆袒衣流汗

又東北入戎州界爲馬湖至關邊縣門與朱提江合流戎門南城入外江

昆池在柘東城西南百餘里四十五里

案此四字疑衍文水源

從金馬山東北來柘東城北十數餘里官路有橋渡此水闊二丈餘清深迅急至碧雞山下爲昆州因水爲名也土蠻亦呼名滇池案今晉寧川中自有大池在東南當是滇池水不可呼池乃蠻不能別滇池水亦名東昆池西南遶山又西北池流爲河過安寧城下亘水東西有橋三十一闊長三百餘步徒行七日程與瀘水合

又量水川在滇池南兩日程漢舊黎州也川中有大池

其水東洩流處出一石竇中流水甚廣石竇甚狹土蠻云忽竇空百姓憂溺新豐川亦有大池甚廣

蘭滄江源出吐蕃中大雪山下莎川東南過聿齋城西謂之瀨水河又過順蠻部落南流過劍川大山之西蘭滄江南流入海龍尾城西第七驛有橋卽永昌也兩崖高險水迅激橫巨大竹索爲梁上布箐箐上實板仍通以竹屋蓋橋其穿索石孔孔明所鑿也昔諸葛征永昌於此築城今江西山上有廢城遺跡及古碑猶存亦有神祠廟存焉

又麗水一名祿旱江

案旱字字書不載

源自邏些城三危山下

南流過麗水城西又南至蒼望又東南過道雙王道勿川西過彌諾道立柵又西與彌諾江合流過驃國南入于海水中蛟龍鱔魚烏鰂魚又有水獸似牛游泳則波濤沸湧狀如海潮禹貢導黑水至于三危蓋此是也或云源當是大月河恐非也

又彌諾江在麗水西源出西北小婆羅門國南流過泖叻苴川又東南至兜彌伽木柵分流遶柵居沙灘南北一百里東西六十里合流正東過彌臣國南入于海

蠻書卷第一

Blank columns for the first volume of the text.

蠻書卷第三

唐

樊

綽

撰

六詔第三

六詔並烏蠻又稱八詔蓋白巖城時傍及劍川矣羅識二詔之後開元元年中蒙歸義攻石橋城閣羅鳳攻石和亦八詔之數也

時傍母蒙歸義之女妻閣羅鳳

案新唐書南詔傳云時傍母歸義女其女復妻

閣羅鳳据其文則此妻字上應有其女復三字蓋原本脫誤

初畔羅皮既敗時傍入

居遼州招誘上浪得數千戶後為閣羅鳳所猜遂遷居

白崖城及劍川羅識與神川都督言語交通

案原本川都督上脫

神字今據新唐書增入時侑與其謀俱求立為詔謀洩時侑被殺

害羅識北走神川神川都督送羅些二城

案此條雖不標詔名據上

文則時侑及羅識亦在詔數也

蒙嵩一詔最大初嵩輔首卒

案輔原本作轉今從新唐書南詔傳改正

源羅子年弱及照源在南詔蒙歸義密有兼吞之意推

恩昭利源眾歸焉居數月俘照源及源羅子遂并其地

三越析一詔也亦謂之磨些詔部落在賓居舊越析州

也去囊葱山一日程有豪族張尋求

案張原本作帳今從新唐書南詔傳

正白蠻也貞元中通詔主波衝之妻遂陰害波衝劍南

節度巡邊至姚州使召尋求笞殺之遂移其諸部落以

地并於南詔波衝兄子于贈提攜家眾走降鐸鞘

案鐸鞘乃

兵器據後物產篇內有越析詔于贈天降鐸鞘云云疑此走字上當有出字降字上當有天字東北渡

瀘邑龍佉沙方一百二十里周迴石岸其地總謂之雙

舍于贈部落亦名楊墮居河之東北後蒙歸義隔瀘城

臨逼于贈再戰皆敗長男閣羅鳳自請將兵乃擊破楊

墮于贈投瀘水死數日始獲其屍并得鐸鞘

四浪穹一詔也詔主豐時豐咩兄弟俱在浪穹後豐咩

襲遼睽居之由是各為一詔豐時卒子羅鐸立羅鐸卒

子鐸邏望立為浪穹州刺史與南詔戰敗以部落退保

劍川故盛稱劍浪卒子望偏立望偏卒羅矣羅君立

案新

唐書南詔傳望偏死子偏羅矣立偏羅矣貞元十年南

詔擊破劍川俘矣羅君徙永昌凡浪穹遼賧施浪總謂之浪人故云三浪詔也

五遼賧一詔也主豐咩初襲遼賧御史李知古案李原

今據新唐書改正領詔出問罪即日伏辜其子咩羅皮後為遼

賧州刺史與蒙歸義同伐靜河蠻遂分據大釐城咩羅

皮乃歸義之甥也弱而無謀歸義襲其城奪之咩羅皮

復入遼賧即與浪穹施浪兩詔援兵伐歸義于時既剋

大釐築龍口城歸義聞三浪兵至率眾拒戰三浪大敗

追奔過遼賧敗卒多陷死於泥沙之中咩羅皮從此退

居野共川咩羅皮卒子皮羅遼立皮羅遼卒子遼羅顛

立遼羅顛卒子顛之託立案顛之託新唐書作顛文託南詔既破劍

川收野共俘顛之託徙永昌

六施浪一詔也詔主施望欠初閣羅鳳據石和城俘施

各皮而望欠援絕後與豐咩咩羅皮同伐蒙歸義又皆

敗潰退保矣苴和城歸義稍從江口進兵脅其部落無

幾施望欠眾潰僅以家族之半西走永昌初聞歸義又

軍於蘭滄江東去必取永昌不能容望欠計無所出有

女名遺南以色稱却遣使求致遺南於歸義許之望欠

遂渡蘭滄江終於蒙舍

望欠弟望千當矣苴和城初敗之時北走吐蕃吐蕃立為詔歸於劍川為衆數萬望千生千傍傍生傍羅顛南

詔既破劍川盡獲施浪部落傍羅顛脫身走瀘北今三

浪悉平惟傍羅顛矣識案矣識即前所稱劍川矣羅識也子孫在蕃中

案望千雖不標詔名而列於六詔入詔之間則以當第七詔也

入蒙舍一詔也居蒙舍川在諸部落之南故稱南詔也

姓蒙貞元年中獻書於劍南節度使韋臯自言本永昌

沙壺之源也南詔八代祖舍龍生龍獨羅亦名細奴邏

當高宗時遣首領數詣京師朝參皆得召見賞錦袍錦

袖紫袍細奴邏生邏盛炎炎生盛邏皮盛邏皮生閣羅

鳳案唐書盛邏皮下尚有皮當天后時邏盛入朝其妻

方娘行次姚州生盛邏皮邏盛炎炎聞而喜曰吾且有子

承繼身到漢地死無憾矣既至謁見大蒙恩獎勅鴻臚

安置賜錦袍金帶繒綵數百匹歸本國開元初卒其子

盛邏皮立朝廷授特進臺登郡王知沙壺州刺史長男

閣羅鳳授特進兼楊瓜州刺史次男成節度蒙舍州刺

史次男崇江東刺史次男成進雙祝州刺史初炎閣未

有子案唐書炎閣為邏盛養閣羅鳳為子閣羅鳳復歸

蒙畔故名承炎閣後亦不改天寶四載閣羅鳳長男鳳

伽異入朝宿衛授鴻臚少卿七載蒙歸義卒案唐書蒙歸義即皮

羅閣乃唐閣羅鳳立朝廷冊襲雲南王矣伽異大卿兼所賜名也楊瓜州刺史閣羅鳳攻石橋城擒施谷皮討越析梟于贈西開尋傳南通驃國及張乾陲陷姚州鮮于仲通戰江口遂與中原隔絕閣羅鳳嘗謂後嗣悅歸皇化但指大和城碑及表疏舊本呈示漢使足以雪吾前過也鳳伽異先死大歷四年閣羅鳳卒伽異長男異牟尋繼立生尋夢湊一名閻勸異牟尋每歎地卑夷雜禮義不通隔越中華杜絕聲教遂獻書檄寄西川節度使韋臯韋臯荅牟尋書申以朝廷之命牟尋不謀於下陰決大計遂三路發使冀有一達一使出安南一使出西川一使

由黔中案此五字原本脫據唐書補入貞元十年三使悉至闕下朝廷

納其誠款許其歸化節度恭承詔旨專遣西川判官唐案

書作巡官崔佐時親信數人越雲南與牟尋盟於玷蒼山下

誓文四本內一本進獻一本異牟尋置於玷蒼山下神

祠石函內一本納於祖父等廟一本置府庫中以示子

孫不令背逆不令侵掠

臣咸通四年正月奉本使尙書蔡襲意旨令書吏寫

蠻王異牟尋誓文數本並書牒繫於車弩上飛入賊

營臣切覽牟尋誓文立盟極切今南蠻子孫違負前

誓伏料天道必誅容臣親於江源訪覓其誓文續俟

寫錄真本進上案異牟尋誓文今附卷末而此云待訪覓續寫者蓋其初作此篇時尚未得誓文故所言如此其後訪覓附入而此本未及刊削遂前後互異其說耳

蠻書卷第三

蠻書卷第四

唐

樊

綽

撰

名類第四

西爨白蠻也東爨烏蠻也當天寶中東北自曲靖州西南至宣城邑落相望牛馬被野在石城昆川曲軛晉寧喻獻安寧至龍和城謂之西爨在曲靖州彌鹿川升麻川南至步頭謂之東爨風俗名爨也初爨歸王為南寧州都督理石城襲殺蓋騁蓋啓父子案原本訛作孟軻孟啓今據新唐書改遂有升麻川歸王兄摩湓湓生崇道理曲軛川為兩爨大鬼主崇道弟日進日用在安寧城及章仇兼瓊開

步頭路方於安寧築城羣蠻騷動陷殺築城使者元宗遣使勅雲南王蒙歸義討之歸義師次波州而歸王及崇道兄弟爨彥璋等千餘人詣軍門拜謝請奏雪前事歸義露章上聞往返二十五日詔書下一切釋罪無何崇道殺日進又陰害歸王歸王妻阿姹烏蠻女也走投父母稱兵相持諸爨豪亂阿姹私遣使詣烏蒙舍川求投歸義即日抗疏奏聞阿姹男守偶案守偶新唐書作守隅遂代歸王爲南寧州都督歸義仍以女妻之又以一女妻崇道男輔朝崇道內懷忿惋外示和平猶與守偶母子日相攻伐阿姹又訴於歸義興師問罪行次昆川信宿而

曲輒川潰散崇道南走黎川歸義盡俘其家族羽黨并殺輔朝而取其女崇道俄亦被殺諸爨由是離弱及歸

義卒子閣羅鳳立守偶并妻歸河賧

案河賧原本作阿體今從唐書改正

從此與皇化隔絕阿姹自爲烏蠻部落王從京師朝參大蒙恩賞閣羅鳳遣昆川城使楊牟利以兵圍脇西爨徙二十餘萬戶於永昌城烏蠻以言語不通多散林谷故得不徙是後自曲靖州石城升麻川昆川南至龍和以來蕩然兵荒矣日用子孫今立在永昌城界內烏蠻種類稍稍復振後徙居西爨故地今與南詔爲婚姻之家

南蠻去安峰州林西原界二十二日程

自大中八年安南都護擅罷林西原防冬戍卒洞主李由獨等七縮首領被蠻誘引復為親情日往月來漸遭侵軼罪在都護失招討之職乖經略之任臣於咸通三年春三月四日奉本使尚書蔡襲手示密委臣單騎及健步二十以下人深入賊帥朱道古營寨三月八日入賊重圍之中蠻賊將楊秉忠大羌楊阿觸楊會盛悉是烏蠻賊人同迎言辭狡詐臣却迴一白於都護王寬寬自是不明都無遠慮領得臣書牒全無指揮擅放軍迴苟求朝獎致令臣本使蔡襲

枉傷矢石陷失城池徵之其由莫非王寬之過

案此條原

本文多訛脫今據通鑑攷異所引蠻書原文訂正攷異又云蔡襲將兵代寬寬為已替之人安能擅放軍回令襲陷沒疑蠻書擅放軍回上少蔡京二字蓋蔡京時為嶺南西道節度貪懦敗事故攷異云然

獨錦蠻烏蠻苗裔也在秦藏南去安寧兩日程天寶中

為蹄州刺史

案蹄州原本作歸州今據新唐書改正

其族多姓李異牟尋

母獨錦蠻之女也牟尋之姑亦嫁獨錦蠻獨錦蠻之女

為牟尋妻有子委負監貞元十年為大將軍在勃弄棟

川為城貞元十年以尚書祠部郎中兼御史中丞袁滋

內給事俱文珍劉幽巖入雲南持節冊南詔異牟尋為

雲南王為西南之藩屏牟尋男閣勸已後繼為王

案貞元十

年以尚書云云至後繼爲王五十八字與獨錦蠻事不相涉以文義推之疑爲八詔篇蒙舍條下之文當在不錯簡於此

弄棟蠻則白蠻苗裔也本姚州弄棟縣部落其地舊爲

褒州嘗有部落首領爲刺史有誤毆殺司戶者爲府城

論罪遂卒家衆案新唐書南詔傳云有爲刺史者誤殺其參軍率族北走據其文則此卒字當作率字家衆下當有北

走二字蓋原本脫誤後分散在磨些江側並劍共諸

川悉有之餘部落不去當天寶中姚州刺史張乾陁守

城拒戰陷死殆盡貞元十年南詔異牟尋破掠吐蕃城

邑收獲弄棟城遷於永昌之城

青蛉蠻亦白蠻苗裔也本青蛉縣部落天寶中雋州初

陷有首領尹氏父兄弟相率南奔河賧閣羅鳳厚待

之貞元年中南詔清平官尹輔曾尹寬求案唐書作尹仇寬皆

其人也衣服言語與蒙舍略同

裳人本漢人也部落在鐵橋北不知遷徙年月初襲漢

服後稍參諸戎風俗迄今但朝霞纏頭其餘無異貞元

十年南詔異牟尋領兵攻破吐蕃鐵橋節度城獲裳人

數千戶悉移於雲南東北諸川今鐵橋城爲南蠻所據

差大將軍爲城使

長禪蠻本烏蠻之後部落在劍川屬浪詔其本俗皆衣

長禪曳地更無衣服惟牛羊皮南詔旣破劍浪遂遷其

部落與施順諸蠻居養給之

河蠻本西洱河人今呼為河蠻故地當六詔皆在而河

蠻自固洱河城邑開元已前嘗有首領入朝本州刺史

受賞而歸者及南詔蒙歸義攻拔大城河蠻遂迸遷化

皆羈制於浪詔貞元十年浪詔破敗復徙於雲南東北

柘東以居柘東城去安南城三十九日程咸通三年十

二月二十七日蠻賊逼交州池城案通原本作通今據通鑑攷異所引蠻書

文改河蠻在蘇歷舊城置營案蘇歷原本作蘇厝及分

布賊衆在箛筏士僅二千餘人

施蠻本烏蠻種族也鐵橋西北大施體施賧斂尋皆其

所居之地案新唐書南詔傳作施蠻居大施賧斂尋賧此文疑有誤男以繪布為縵

襠袴婦人從頂橫分其髮當額并頂後各為一髻男女

絡身并跣足披羊皮部落主承上皆吐蕃偽封為王貞

元十年案原本祇作貞元年據新唐書乃貞元十年事今補入南詔攻城邑虜其

王尋羅并宗族置於蒙舍城養給之

順蠻本烏蠻種類初與施蠻部落參居劍共諸川咩羅

皮鐸羅望既失遼川浪穹退而逼奪劍共由是遷居鐵

橋已上其地名劍羌在斂尋賧西北四百里男女風俗

與施蠻略同其部落主吐蕃亦封王貞元十年南詔異

牟尋虜其王傍彌潛宗族置於雲南白巖養給之其施

蠻部落百姓則散隸東北諸川

磨蠻亦烏蠻種類也鐵橋上下及大婆小婆三探覽昆池等川皆其所居之地也土多牛羊一家即有羊羣終身不洗手面男女皆披羊皮俗好飲酒歌舞此種本姚州部落百姓也南詔既襲破鐵橋及昆池等諸城凡虜獲萬戶盡分隸昆川左右及西爨故地

磨些蠻在施蠻外與南詔為婚姻家又與越析詔姻婭撲子蠻勇悍矯捷以青婆羅段為通身袴善用白箕竹深林間射飛鼠發無不中部落首領謂曾為上無食器以芭蕉葉藉之開南銀生永昌尋傳四處皆有鐵橋西

北邊延蘭滄江亦有部落臣本使蔡襲咸通四年正月三日陣面上生擒得撲子蠻拷問之並不語截其腕亦不聲安南子城虞候梁軻云是撲子蠻今梁軻見在賊中僭稱朱鳶縣令其梁軻始由再賓任使

案再賓二字未詳

後三度到蠻王處通好結構禍胎

尋傳蠻閣羅鳳所討定也俗無絲絲布帛披波羅皮跣

足可以踐履榛棘持弓挾矢射豪猪

案豪字原本作蒙今據新唐書南詔

傳改

生食其肉取其兩牙雙插髻倚為飾又條猪皮以

繫腰每戰鬪即以籠子籠頭如兜鍪狀臣本使蔡襲咸通三年十二月二十七日以小槍鏢得一百餘人臣本

使蔡襲問梁軻見有竹籠頭猪皮繫腰遂說尋傳蠻本
末江西將軍士取此蠻肉為炙

裸形蠻在尋傳城西三百里為窠穴謂之為野蠻閣羅

鳳既定尋傳而令野蠻散居山谷其蠻不戰自調伏集

戰自召之案二語文義未明疑有脫誤其男女遍滿山野亦無君長

作搗欄舍屋案搗說文集韻並音劫音臍刮也撻也多女少男無農田無

衣服惟取木皮以蔽形或十妻五妻共一丈夫盡日持

弓不下搗欄有外來侵暴者則射之其妻入山林採拾

蟲魚菜螺蜆等歸啖食之去咸通三年十二月二十一

日亦為羣隊當陣面上如有不前衝前監陣正蠻旋刃

其後

望苴子蠻在蘭滄江以西是盛羅皮所討定也矯捷善

於馬上用槍鏟騎馬不用鞏跣足衣短甲纔蔽胸腹而

已股膝皆露兜鍪上插犛牛尾馳突若飛其婦人亦如

此南詔及諸城鎮大將出兵則望苴子為前驅咸通四

年正月二十三日蔡襲城上以車弩射得望苴子二百

人馬三十餘匹二月七日城陷及臣本使蔡襲在左膊

中箭元從已盡臣右腕中箭攜印浮水渡江荆南江西

鄂岳襄州將健約四百餘人案此句原脫荆南二字又岳字訛作兵字今從通鑑

改攜陌刀騎馬突到城東水際荆南都虞候元惟德管

都頭譚可言江西軍判官傳門謂將士曰諸兒郎等水
 次無船入水必死與諸兄弟每一箇人殺得兩蠻賊我
 輩亦得便宜遂相率入東羅城擁門裏一邊排長刀一
 邊排長馬突其蠻賊從城外水次騎馬入門悉無備敵
 臣見僧無碍說云案此句原本作臣見僧元得今攷通鑑攷異有引樊綽所說僧無碍之文
 知得碍字形相近而无又訛為元耳謹改正此日午前旋殺賊并馬僅二三
 千賊馬三百來匹蠻賊楊思縉案唐書作思僭誤在子城內一
 更時始知出救翌日以馬肉分俵十二營賊眾
 望蠻外喻部落在永昌西北其人長排持稍前往無敵
 又能用木弓短箭箭鏃傅毒藥所中人立斃婦人亦跣

足以青布為衫裳聯貫珂貝巴齒真珠斜絡其身數十
 道有夫者豎分兩髻無夫者頂為一髻其地宜沙牛亦
 大於諸處牛角長四尺已來婦人惟嗜乳酪肥白俗好
 遨遊

黑齒蠻金齒蠻銀齒蠻繡腳蠻繡面蠻並在永昌開南
案開南新唐書作關南與此異雜類種也黑齒蠻以漆漆其齒金齒蠻
 以金鏤片裹其齒有事出見人則以此為飾食則去之
 皆當頂為一髻以青布為通身袴又斜披青布條案此處脫
銀齒蠻繡腳蠻則於踝上排下周匝刻其膚為文彩衣
 以緋布以青色為飾繡面蠻初生後出月以針刺面上

以青黛傅之僧者案僧者亦蠻部之名此下當有脫文悉屬西安城皆為南詔總之攻戰亦召之

穿鼻蠻長鬚蠻棟峰蠻其蠻並在柘東南生雜類也穿鼻蠻部落以徑尺金環穿鼻中隔下垂過領若是君長即以絲繩繫其環使人牽起乃行其次者以花頭金釘兩枚從鼻兩邊穿令透出鼻孔中長鬚蠻部落棟峰蠻部落髮黑而長當額前為一長髻下過臍每行即以物撐起若是君長即使兩女人前各持一物兩邊撐其髻乃行今亦為南詔所總攻戰即點之

茫蠻部落並是開南雜種也茫是其君之號蠻呼茫詔

從永昌城南先過唐封以至鳳藍茸以次茫天連以次

茫吐薺又有大賧茫昌茫盛恐茫蘇茫案蘇新唐書作鮮施茫

皆其類也樓居無城郭或漆齒皆衣青布袴藤篋纏腰紅繪布纏髻出其餘垂後為飾婦人披五色娑羅籠孔雀巢人家樹上象大如水牛土俗養象以耕田仍燒其糞貞元十年南詔異牟尋攻其族類咸通三年十二月二十一日亦有此茫蠻於安南蘇歷江岸聚二三千人隊

粟粟兩姓蠻雷蠻夢蠻皆在茫部臺登城東西散居皆烏蠻白蠻之種族丈夫婦人以黑繪為衣其長曳地又

東有白蠻丈夫婦人以白繒為衣下不過膝夢蠻主苴

夢衝案苴原本作首今從唐書改正開元末嘗受恩賜於國而暮年又

私於吐蕃貞元七年西川節度使韋臯遣鶴州刺史蘇

隗案唐書作蘇峴就殺夢衝因別立鬼主以總其部落共推為

蠻長貞元中船持為都大鬼主其時夢衝及驃傍皆卑

事之亦呼為東蠻

豐巴蠻案豐巴唐書作豐琶本出鶴州百姓兩林南二百里而居

焉豐巴部落貞元中大鬼主驃傍阿諾兩姓乃諸蠻部

落皆為豐巴部落心長向國案此一段文有脫誤

崇魔蠻去安南管內林西原十二日程溪洞而居俗養

牛馬比年與漢博易自大中八年經略使苛暴令人將

鹽往林西原博牛馬每一頭匹只許鹽一斗因此隔絕

不將牛馬來

桃花人本屬安南林西原七縮洞主大首領李由獨管

轄亦為境上戍卒每年亦納賦稅自大中八年被峰州

知州官申文狀與李涿請罷防冬將健六千人案與李涿三字

原本作與涿今據通鑑攷異所引蠻書文改正不要味真登州境上防遏案味原本

作來今據通鑑攷異所引蠻書文改正其由獨兄弟所不禁被蠻柘東節

使與書信案書信原本作善信今據通鑑攷異所引蠻書文改正將外甥嫁與李

由獨小男補柘東押衙自此之後七縮洞悉為蠻收管

臣於咸通三年三月八日入賊重圍因見柘東蠻判官楊忠義背後領八箇蠻持弓槍臣因問賊帥朱道古根源切以桃花人今亦呼桃花蠻也本安南林西原七綰洞左右側居人披羊皮或披氈前梳髻雖拘於蠻心皆向唐化咸通三年三月二十一日僅五六千人安南城西角下營蠻賊楊思縉委羅伏州扶邪縣令麻光高部領之

案光高原本作先高今據通鑑攷異有引蠻書思縉光高部領之文知先字當作光字謹改正

蠻書卷第四

蠻書卷第五

唐

樊

綽

撰

六賧第五

賧者州之名號也韋齊休雲南行記有十賧字作此賧字案賧字原本誤作

大和陽苴咩謂之陽賧大釐謂之史賧遼川謂之賧賧

蒙舍謂之蒙舍賧白崖謂之勃弄賧

案標題稱六賧第十卷亦有六賧之

北鎮西及開南銀生等七城則有大軍將領之亦稱節

度貞元十年掠吐蕃鐵橋城今稱鐵橋節度其餘鎮皆

分隸焉

案自雲南柘東至皆分隸焉五十二字與六賧文不相屬疑為第六篇雲南城鎮條下之文錯

簡於此

大和城大釐城陽苴咩城本皆河蠻所居之地也開元二十五年蒙歸義逐河蠻奪據大和城後數月又襲破苴咩盛羅皮取大釐城仍築龍口城為保障閣羅鳳多由大和大釐遼川來往蒙歸義男等初立大和城以為不安遂改剏陽苴咩城

大和城北去陽苴咩城一十五里巷陌皆壘石為之高丈餘連延數里不斷城中有大牌閣羅鳳清平官王蠻利之文案舊唐書閣羅鳳得西瀘令鄭回甚愛重之更名蠻利後為清平官此云王蠻利者疑即其人也論阻絕皇化之由受制西戎之意

龍口城閣羅鳳所築縈抱玷蒼南麓數里城門臨洱水下河上橋長百餘步過橋分三路直南蒙舍路向西永昌路向東白崖城路

大釐城南去陽苴咩城四十里北去龍口城二十五里邑居人戶尤眾盛羅皮多在此城并陽苴咩并遼川今並南詔往來所居也家室共守五處如一東南十餘里有舍利水城在洱河中流島上四面臨水夏月最清涼南詔常於此城避暑

陽苴咩城南詔大衙門上重樓左右又有階道高二丈餘瑩以青石為磴樓前方二三里南北城門相對太和

來往通衢也從樓下門行三百步至第二重門門屋五
閒兩行門樓相對各有榜并清平官大軍將六曹長宅
也入第二重門行二百餘步至第三重門門列戟上有
重樓入門是屏牆又行一百餘步至大廳階高丈餘重
屋製如蛛網架空無柱兩邊皆有門樓下臨清池大廳
後小廳小廳後卽南詔宅也客館在門樓外東南二里
館前有亭亭臨方池周迴七里水深數丈魚鼈悉有
遼川城舊遼川也南去龍口城十五里初望父部落居
之後浪穹詔豐咩襲而奪之豐咩孫鐸望與南詔戰敗
退保劍川南遂有城城依山足東距瀘水北有泥沙自

閣羅鳳及異牟尋皆填固增修最爲名邑東北有史郎
川又東祿諾品川又北俄坤

蒙舍川羅盛已上之地舊爲蒙舍州去龍口城一日程
當五詔俱存而蒙舍北有蒙儁詔卽楊瓜州也同在一
川地氣有瘴肥沃宜禾稻又有大池周迴數十里多魚
及菱芡之屬川中水東南與勃弄川合流南有籠磨些
川凡遼川河蒙舍謂之川賧然邑落人衆蔬果水凌之
味則蒙舍爲尤殷

渠斂趙本河東州也西巖有石和城烏蠻謂之土山坡
陀者謂此州城及大和城俱在陂陀山上故也州中列

樹夾道爲交流村邑連薨溝塍彌望大族有王楊李趙
四姓皆白蠻也云是沮蒲州人遷涉至此因以名州焉
東北至毛郎川又東北至賓居湯又北至越析川磨些
詔故地也

白崖城在勃弄川天寶中附于忠城陽等五州之城也
依山爲城高十丈四面皆引水環流惟開南北兩門南
隅是舊城周迴二里東北隅新城大歷七年閣羅鳳新
築也周迴四里城北門外有慈竹藜大如人脰高百尺
餘城內有閣羅鳳所造大廳修廊曲廡廳後院橙枳青
翠俯臨北墉舊城內有池方三百餘步池中有樓舍云

貯甲仗川東西二十餘里南北百餘里清平官已下官
給分田悉在南詔親屬亦住此城傍其南二十里有蠻
子城閣羅鳳庶弟誠節母子舊居也正南去開南城十
一日程

蠻書卷第六

唐

樊

綽

撰

雲南城鎮第六

雲南城天寶中閣羅鳳所規置也嘗為信州地城池郭
 邑皆如漢制州中南北二十餘里東西四十五里帶邑
 及過山雖有三千餘戶田疇多廢閭里少人諸葛亮分
 永昌東北置雲南郡斯即其故地也西隔山有品驗賧
 亦名清字川嘗為波州大池遶山長二十餘里波州廢
 地在池東南隅故渭北節度段子英此州人也故居墳
 墓皆在雲南東第二程有欠舍川大都部落第三程至

石鼓驛舊化川也第四程至曲驛有大覽睽小覽睽漢舊覽州也

弄棟城在故姚州川中南北百餘里東西三十餘里廢城在東巖山上當川中有平巖周迴五六頃新築弄棟城在其上管雜蠻數部落悉無漢人姚州百姓陷蠻者皆被移隸遠處

柘東城廣德二年鳳伽異所置也其地漢舊昆川故謂昆池東北有井邑城隍城西有漢城土俗相傳云是莊躋故城城之東十餘里有穀昌村漢穀昌王故地也貞元十年南詔破西戎遷施順磨些諸種數萬戶以實其

地又從永昌以望苴子望外喻等千餘戶分隸城傍以靜道路

晉寧州漢滇河故地也在柘東城南八十里晉平川幅員數百里西爨王墓纍纍相望

石城川味縣故地也貞觀中爲郎州開元初改爲南寧州州城卽諸葛亮戰處故城也城中有諸葛亮所撰文立二碑背上篆文曰此碑如倒蠻爲漢奴近年蠻夷以

木搯柱案新唐書謂諸葛亮碑在柘東城與此不合蓋唐書之誤臣今春見安南兵

馬使郭延宗曾奉使至柘東停住一月日館穀勤厚贈遺不輕案以上五句與上下文不相屬疑亦錯簡在此又有夔鹿弄川漢同勞

縣故地也案舊唐書地理志郎州有同樂縣同勞疑卽同樂之訛在龍河遇川南

百餘里

石城南面有新豐川漢南寧州新豐縣故地也廢城牆塹猶在大小石城川同

升麻川西川南有曲輓川漢南寧州同起縣也

安寧鎮去柘東城西一日程連然縣故地也通海鎮去

安寧西第三程至龍封驛驛前臨瘴川去柘東城八日

程漢俞元縣故地也量水川案舊唐書地理志黎州有梁水縣量水蓋卽梁水轉

音之訛漢舊黎州今吐蕃呼爲量水川通海城南十四日

程至步頭從步頭船行沿江三十五日出南蠻夷人不

解舟船多取通海城路賈勇步入真登州林西原取峯州路行量水川西南至龍河又南與青木香山路直南至崑崙國矣

寧北城在漢牒榆縣之東境也本無城池今以浪人詔

矣羅君舊宅爲理所東地有野共川北地有虺川又北

有橫川又北有郎婆川又北有桑川卽至鐵橋城北九

跋川又西北有羅眉川又西牟郎共城又西至傍彌潛

城西有鹽井鹽井西有斂尋城皆施蠻順蠻部落今所

居之地也又西北至聿賚城又西北至弄視川

鐵橋城在劍川北三日程川中平路有驛貞元十年南

詔蒙異牟尋用軍破東西兩城斬斷鐵橋大籠官已下
投水死者以萬計今西城南詔置兵守禦東城至神川
以來半爲散地見管浪加萌於浪傳堯長禪磨些撲子
河人弄棟等十餘種

昆明城在東瀘之西去龍口十六日程正北有諱苴川
正南至松外城又正南至龍怯河西南至小婆城又西
南至大婆城西北至三探覽城又西北至鐵橋東城其
鐵橋上下乃昆明雙舍至松外已東邊近瀘水並磨些
種落所居之地

永昌城古哀牢地在玷蒼山西六日程西北去廣蕩城
六十日程廣蕩城接吐蕃界隔候雪山西邊大洞川亦
有諸葛武侯城城中有神廟土俗咸共敬畏禱祝不闕
蠻夷騎馬遙望廟卽下馬趨走西南管柘南城土俗相
傳呼爲要鎮正南過唐封川至茫天連自蘭滄江已西
越賧撲子其種並是望苴子俗尚勇力士又多馬開元
已前閉絕與六詔不通盛羅皮始罷柘俞城閣羅鳳已
後漸就柔服通計南詔兵數三萬而永西居其一又雜
種有金齒漆齒銀齒繡脚穿鼻裸形磨些望外喻等皆
三譯四譯言語乃與河賧相通

銀生城在撲賧之南去龍尾城十日程東南有通鏡川

又直南通河普川又正南通羌浪川卻是邊海無人之境也東至送江川南至邛鵝川又南至林記川又東南至大銀孔又南有婆羅門波斯闍婆勃泥崑崙數種外通交易之處多諸珍寶以黃金麝香爲貴貨撲子長鬃等數十種蠻又開南城在龍尾城南十一日程管柳追和都督城又威遠城奉逸城利潤城內有鹽井一百來所茫乃道并黑齒等類十部落皆屬焉陸路去永昌十三日程水路下彌臣國三十日程南至南海去崑崙國三日程中間又管模迦羅于泥禮強子等族類五部落越禮城在永昌北管長傍藤彎長傍城三面高山臨祿

旱江藤彎城南至磨些樂城西南有羅君尋城又西至利城渡水郎陽川直南過山至押西城又南至首外川又西至茫部落又西至鹽井又西至拔熬河麗水城尋傳大川城在水東從上郎坪北里眉羅苴鹽井又至安西城直北至小婆羅門國東有寶山城又西渡麗水至金寶城眉羅苴西南有金生城從金寶城北牟郎城渡麗水至金寶城從金寶城西至道吉川東北至門波城西北至廣蕩城接吐蕃界北對雪山所管部落與鎮西城同鎮西城南至蒼望城臨麗水東北至彌城西北至麗水渡麗水渡面南至祁鮮山山西有神龍河柵祁鮮

蠻書卷第六
已西卽裸形蠻也管摩零都督城在山上自尋傳祁鮮
已往悉有瘴毒地平如砥冬草木不枯日從草際沒諸
城鎮官懼瘴癘或越在他處不親視事南詔特於摩零
山上築城置腹心理尋傳長傍摩零金彌城等五道事
云凡管金齒漆齒繡脚繡面彫題僧耆等十餘部落

蠻書卷第七

唐

樊

綽

撰

雲南管内物產第七

從曲靖州已南滇池已西土俗唯業水田種麻豆黍稷
不過町疇水田每年一熟從八月穫稻至十一月十二
月之交便於稻田種大麥三月四月卽熟收大麥後還
種粳稻小麥卽於岡陵種之十二月下旬已抽節如三
月小麥與大麥同時收刈其小麥麩軟泥少味大麥多
以爲麩別無他用醞酒以稻米爲麩者酒味酸敗每耕
田用三尺犁格長丈餘兩牛相去七八尺一佃人前牽

牛一佃人持按犁轅一佃人秉耒蠻治山田殊爲精好
悉被城鎮蠻將差蠻官遍令監守催促如監守蠻乞酒
飯者察之杖下捶死每一佃人佃疆畛連延或三十里
澆田皆用源泉水旱無損收刈已畢官蠻據佃人家口
數目支給禾稻其餘悉輸官

蠻地無桑悉養柘蠶遶樹村邑人家柘林多者數頃聳
幹數丈三月初蠶已生三月中繭出抽絲法稍異中土
精者爲紡絲綾亦織爲錦及絹其紡絲入朱紫以爲上
服錦文頗有密緻奇采蠻及家口悉不許爲衣服其絹
極麤原細入色

案原細二字未詳

製如衾被庶賤男女許以披

之亦有刺繡蠻王并清平官禮衣悉服錦繡皆上綴波

羅皮

南蠻呼大蟲爲波羅密

俗不解織綾羅自大和三年蠻賊寇

西川虜掠巧兒及女工非少如今悉解織綾羅也

自銀生城柘南城尋傳祁鮮已西蕃蠻種並不養蠶唯
收婆羅樹子破其殼中白如柳絮組織爲方幅裁之籠
頭男子婦女通服之驃國彌臣諾悉皆披羅段

其鹽出處甚多煎煮則少安寧城中皆石鹽井深八十
尺城外又有四井勸百姓自煎天寶八載元宗委特進
何履光統領十道兵馬從安南進軍伐蠻國十載已收
復安寧城并馬援銅柱本定疆界在安寧去交阯四十

大蟲即虎也唐人避諱稱
虎曰大蟲凡文字有用虎者
皆改曰獸曰武

八日程安寧郡也何履光本是邕管貴州人舊嘗任交
 容廣三州節度天寶十五載方收蠻王所坐大和城之
 次屬安祿山造逆奉元宗詔旨將兵赴西川遂寢其收
 復案此條乃敘次鹽井所在其天寶八載以下一百十
 四字於上下語意不相屬疑亦他處之文因安寧城
 而錯誤升麻通海已來諸爨蠻皆食安寧井鹽唯有覽
 在此 睽城內郎井鹽潔白味美惟南詔一家所食取足外輒
 移竈緘閉其井瀘南有美井鹽河睽白崖雲南已來供
 食昆明城有大鹽池比陷吐蕃蕃中不解煮法以鹹池
 水沃柴上以火焚柴成炭即於炭上掠取鹽也貞元十
 年春南詔收昆明城今鹽池屬南詔蠻官煮之如漢法

也東蠻磨些蠻諸蕃部落共食龍怯河水中有鹽井兩
 所斂尋東南有傍彌潛井沙追井西北有若耶井諱溺
 井劍川有細諾鄧井麗水城有羅苴井長傍諸山皆有
 鹽井當土諸蠻自食無權稅蠻法煮鹽咸有法令顆鹽
 每顆約一兩二兩有交易即以顆計之
 茶出銀生城界諸山散收無採造法蒙舍蠻以椒薑桂
 和烹而飲之

荔枝檳榔訶黎勒椰子桄榔等諸樹永昌麗水長傍金
 山並有之

甘橋大釐城有之其味酸寧睽有橋大如覆杯案橋疑
 橋字之

訛

麗水城又出波羅蜜果大者若漢城甜瓜引蔓如蘿蔔十一月十二月熟皮如蓮房子處割之色微紅似甜瓜香可食或云此即思難也南蠻以此果為珍好祿阜江左右亦有波羅蜜果樹高數十丈大數圍生子味極酸蒙舍永昌亦有此果大如甜瓜小者似橙柚割食不酸即無香味土俗或呼為長傍果或呼為思漏果亦呼思難果其次有雄黃蒙舍川所出

青木香永昌出其山多青木香山在永昌南三日程濩歌諾木麗水山谷出大者如臂小者如三指割之色

如黃蘗土人及賧蠻皆寸截之丈夫婦女久患腰脚者浸酒服之立見效驗

藤蒲生永昌河賧緣彼處無竹根以藤漬經數月色光

赤彼土尚之案此條文義未明疑有訛脫

孟灘竹長傍出其竹節度三尺柔細可為索亦以皮為麻

野桑木永昌巴西諸山谷有之生於石上及時月擇可為弓材者先截其上然後中割之兩向屈令至地候木性定斷取為弓不施筋漆而勁利過於筋弓蠻中謂之臚弓者是也案新唐書南詔傳作臚弓

生金出金山及長傍諸山藤充北金寶山土人取法春
冬閒先於山上掘坑深丈餘闊數十步夏月水潦降時
添其泥土入坑卽於添土之所沙石中披揀有得片塊
大者重一觔或至二觔小者三兩五兩價貴於麩金數
倍然以蠻法嚴峻納官十分之七八其餘許歸私如不
輸官許遞相告麩金出麗水盛沙淘汰取之沙賤法男
女犯罪多送麗水淘金長傍川界三面山並出金部落
百姓悉納金無別稅役征徭

銀會同川銀山出錫瑟瑟山中出禁戢甚嚴

琥珀永昌城界西去十八日程琥珀山掘之去松林甚

遠片塊大重二十餘觔貞元十年南詔蒙異牟尋進獻
一塊大者重二十六觔當日以爲罕有也

馬出越賧川東面一帶崗西向地勢漸下乍起伏如哇
畛者有泉地美草宜馬初生如羊羔一年後紐莎爲攏
頭縻繫之三年內飼以米清粥汁四五年稍大六七年
方成就尾高尤善馳驟日行數百里本種多驄故代稱
越賧驄近年以白爲良藤充及申賧亦出馬次賧滇池
尤佳東爨烏蠻中亦有馬比於越賧皆少一切野放不
置槽櫪唯陽苴畔及大釐登川各有槽櫪餵馬數百匹
屏出越賧高麗其人以陷穽取之每殺之時天雨震雷

暴作尋傳川界殼弄川界亦出犀皮蠻排甲并馬統備
案新唐書馬騎甲仗多用犀革亦雜用牛皮負排羅苴
作統倫

已下未得繫金佉苴者悉用犀革為佉苴皆朱漆之
大蟲南詔所披皮赤黑文深炳然可愛云大蟲在高山
窮谷者則佳如在平川文淺不任用

麝香出永昌及南詔諸山土人皆以交易貨幣

沙牛雲南及西爨故地並只生沙牛俱緣地多瘴草深
肥牛更蕃生犢子天寶中一家便有數十頭通海已南
多野水牛或一千二千為羣彌諾江巴西出犛牛開南
巴南養處大於水牛一家數頭養之代牛耕也

鹿傍西洱沙諸山皆有鹿龍尾城東北息龍山南詔養
鹿處要則取之覽賤有織和川及鹿川龍足鹿白晝三
十五十羣行齧草

鯽魚蒙舍池鯽魚大者重五觔西洱河及昆池之南接
滇池冬月魚雁鴨丰雉水扎鳥遍於野中水際

大雞永昌雲南出重十餘觔背距勁利能取鸕鵂戴鵲
鳧鵠鴈鴒之類

象開南巴南多有之或捉得人家多養之以代耕田也
猪羊猫犬騾驢豹兔鵝鴨諸山及人家悉有之但食之
與中土稍異蠻不待烹熟皆半生而喫之

大羊多從西羌鐵橋接吐蕃界三千二千口將來博易
鐸鞘狀如刀戟殘刃積年埋在高土中亦有孔穴傍透
朱笥出麗水裝以金穹鐵篋所指無不洞也南詔尤所
寶重以名字呼者有六一曰祿婆摩求二曰虧雲孚三
曰鐸菀四曰鐸摩那五曰同鐸案惟有五名疑闕其一昔時越析
詔于贈有天降鐸鞘後部落破敗盛羅皮得之今南詔
蠻王出軍手中雙執者是也貞元十年使清平官尹輔
酋入朝獻其一

鬱刀次於鐸鞘造法用毒藥蟲魚之類又淬以白馬血
經十數年乃用中人肌即死俗祕其法麤問得其由

南詔劍使人用劍不問貴賤劍不離身造劍法鍛生鐵
取迸汁如是者數次烹煉之劍成即以犀裝頭飾以金
碧浪人詔能鑄劍尤精利諸部落悉不如謂之浪劍南
詔所佩劍已傳六七代也

槍箭多用斑竹出蒙舍白崖詔南山谷心實圓緊柔細
極力屈之不屈諸所出皆不及之

蠻書卷第八

唐

樊

綽

撰

蠻夷風俗第八

其蠻丈夫一切披氈其餘衣服略與漢同唯頭囊特異耳南詔以紅綾其餘向下皆以阜綾絹其制度取一幅物近邊撮縫為角刻木如樗蒲頭實角中總髮於腦後為一髻即取頭囊都包裹頭髻上結之羽儀已下及諸動有一切房甄別者案此句疑有訛脫然後得頭囊若子弟及四軍羅苴已下則當額絡為一髻不得戴囊角當頂撮鬚髻並披氈皮俗皆跣足雖清平官大軍將亦不以為

恥曹長已下得繫金佉苴

案原本闕金字今據新唐書增入 或有等第

戰功褒獎得繫者不限常例

貴緋紫兩色得紫後有大功則得錦又有超等殊功者則得全披波羅皮其次功則胸前背後得披而闕其袖又以次功則胸前得披并闕其背謂之大蟲皮亦曰波羅皮謂腰帶曰佉苴

婦人一切不施粉黛貴者以綾錦爲裙襦其上仍披錦方幅爲飾兩股辮其髮爲髻髻上及耳多綴真珠金貝瑟瑟琥珀貴家僕女亦有裙衫常披氎及以繒帛韜其髻亦謂之頭囊

南詔有妻妾數百人總謂之詔佐清平官大軍將有妻妾數十人俗法處子孀婦出入不禁少年子弟暮夜遊行閭巷吹壺盧笙或吹樹葉聲韻之中皆寄情言用相呼召嫁娶之夕私夫悉來相送既嫁有犯男子格殺無罪婦人亦死或有強家富室責資財贖命者則遷徙麗水瘴地終棄之法不得再合

每年十一月一日盛會客造酒醴殺牛羊親族鄰里更相宴樂三月內作樂相慶惟務追歡戶外必設桃茆如歲旦然改年卽用建寅之月其餘節日麤與漢同唯不知有寒食清明耳

每飲酒欲闌卽起前席奉觴相勸有性所不能者乃至起前席扼腕的頽或挽或推情禮之中以此爲重取生鵝治如膾法方寸切之和生胡瓜及椒椒啗之謂之鵝闕土俗以爲上味南詔家食用金銀其餘官將則用竹筯貴者飯以筯不匙賤者搏之而食

一尺漢一尺三寸也一千六百尺爲一里漢秤一分三分之一帛曰冪漢四尺五寸也田曰雙漢五畝也

本土不用錢凡交易繒帛氈罽金銀瑟瑟牛羊之屬以繒帛冪數計之云某物色直若干冪

凡人家所居皆依傍四山上棟下宇悉與漢同惟東西

南北不取周正耳別置倉舍有欄檻腳高數丈云避田鼠也上閣如車蓋狀

西爨及白蠻死後三日內埋殯依漢法爲墓稍富室廣栽杉松蒙舍及諸烏蠻不墓葬凡死後三日焚屍其餘灰燼掩以土壤唯收兩耳南詔家則貯以金瓶又重以銀爲函盛之深藏別室四時將出祭之其餘家或銅瓶鐵瓶盛耳藏之也

言語音白蠻最正蒙舍蠻次之諸部落不如也但名物或與漢不同及四聲訛重大事多不與面言必使人往來達其詞意以此取定謂之行諾

才勺反

大蟲謂之波羅密亦名草羅犀謂之矣讀如咸帶謂之佉苴飯

謂之喻鹽謂之賓鹿謂之識牛謂之舍川謂之賧谷謂

之浪山謂之和山頂謂之葱路舞謂之伽傍加富也閣

高也諾深也苴俊也東爨謂城為弄謂竹為翦謂鹽為

昫謂地為涿謂請為數謂酸為制言語並與白蠻不同

每出軍征役每蠻各攜糧米一斛五升各攜魚脯此外

無供軍糧料者蠻軍憂糧易盡心切於戰出界後許行

劫掠收奪州溪源百姓禾米牛羊等輩用軍之次面前

傷刀箭許將息儻背後傷刀箭輒退者即刃其後案此條當

在第九卷南蠻篇中疑傳寫者誤入於此

蠻書卷第九

唐

樊

綽

撰

南蠻條教第九

南俗務田農菜圃戰鬪不分文武無雜色役每有徵發
 但下文書與村邑理人處剋往來月日而已其兵仗人
 各自賫更無官給百家已上有總佐一千人已上有理
 人官一人約萬家以來卽制都督遞相管轄上官授與
 四十雙漢二頃也上戶三十雙漢一頃五十畝中戶下
 戶各有差降每家有丁壯皆定爲馬軍各據邑居遠近
 分爲四軍以旗幡色別其東南西北每面置一將或管

千人或五百人四軍又置一軍將統之如有賊盜入界
卽罪在所入處面將

羅苴子皆於鄉兵中試入故稱四軍苴子戴光兜

唐書南詔傳作戴朱鞮負犀皮銅股排跣足歷險如飛

新案每百人羅苴佐一人管之

負排又從羅苴中揀入無員數南詔及諸鎮大軍將起
坐不相離捍蔽者皆負排也

羽儀亦無員數皆清平官等子弟充諸蠻不與焉常在
雲南王左右羽儀長帳前管係之

羽儀長八人如方內節度支衙官之屬清平官已下每

入見南詔皆不得佩劍唯羽儀長得佩劍出入臥外雖
不主公事最爲心腹親信

其六曹長卽爲主外司公務六曹長六人兵曹戶曹客
曹刑曹工曹會曹一如內州府六司所掌之事又有斷

事曹長推鞠盜賊軍謀曹長主陰陽占候同倫長兩人

案同倫原本訛作司各有副都主月終唱

案此字未詳疑誤曹稽逋如錄事之職曹官文牒下諸城鎮皆呼主者六

曹長有課効明著得遷補大軍將

大軍將一十二人與清平官同列每日見南詔議事出

則領要害城鎮稱節度有事跡功勞殊尤者得除授清

平官案原本以除授為句今據唐書南詔傳大軍將出治軍壁稱節度次補清平官之文是除授下應有清平官三字原本蓋因下條相屬而誤脫耳今增入

清平官六人每日與南詔參議境內大事其中推量一人為內算官凡有文書便代南詔判押處置有副兩員同勾當

又外算官兩人或清平官或大軍將兼領之六曹公事文書成合行下者一切是外算官與本曹出文牒行下亦無商量裁製

又有同倫判官兩人南詔有所處分輒疏記之轉付六曹近年已來南蠻更添職名不少

凡試馬軍須五次上射中片板為一次上中雙庶子案

字未詳為一次上四十步外走馬案此字未詳頗柱中尉子

為一次上盤槍百轉無失為一次上能算能書為一次

上試過有優給

步卒須為五次上玷蒼山頂立旗先上到旗下為一次

上驀一丈三尺坑過為一次上急流水上浮二千尺為

一次上弄劍為一次上負一石五斗米四十里為一次

上已上一試過得上次者補羅苴也

蠻王為樓及諸城鎮林邑但有空平處即立木八十尺刻其上為斗子中間以墨三寸規之名曰頗柱所試人

持竹劍去頗柱四十步外走馬向前柱中鬪子者上中
第二規次之中第一規爲下每農隙之時邑中有馬者
皆騎馬於頗柱下試習

每歲十一月農收既畢兵曹長行文書境內諸城
邑村谷各依四軍集人試槍劍甲冑腰刀悉須犀利一
事闕卽有罪其法一如臨敵布陣羅苴子在前以次弓
手排下以次馬軍三十騎爲隊如此次第常爲定制臨
行交錯爲犯令

每戰南詔皆遣清平官或腹心一人在軍前監視有用
命不用命及功大小先後一一疏記迴具白南詔憑此

爲定賞罰軍將犯令皆得杖或至五十或一百更重者
徙瘴地諸在職之人皆以戰功爲褒貶黜陟

朝廷差使到雲南南詔迎接遠送自數年來緣邕交
兩地長吏苛暴恣殺非辜致令衆蠻告冤因茲頻來
攻掠伏蒙聖心徵發大軍指揮期於尅復其容州經

管三十四羈縻州

案新唐書地理志嶺南道羈縻州九十二隸桂管者七州隸邕管者

二十六州隸安南者四十一州並無屬容管者與此稍有不合

伏請委安南大首領

爲刺史武定州

案新唐書地理志武定州乃安南都護府所屬羈縻州之一

亦請

委大首領爲長吏者踵前許經略使眷顧親屬奏元
從押衙爲刺史恐非穩便臣切知故安南前節度使

趙昌相繼十三年緝理交阯至今遺愛布在耆老至
境內無事其時以都押衙杜英策為招討副使入院
判案每月料錢供給七十貫以寄客張舟為經略判
官已後舉張舟為都護自李象古任安南經略使案
本作李象右今考唐書李象古為安南都護以恣意
苛刻失眾為賊楊清所害蓋即此人今改正
貪害遂至徵兵續又有李涿繼之誅剝案原本涿上
脫李字今據
通鑑令生靈受害莫非長吏非人所致
增入

蠻書卷第九

蠻書卷第十

唐

樊

綽

撰

南蠻疆界接連諸蕃夷國名第十

彌諾國彌臣國皆邊海國也呼其君長為壽彌諾面白
而長彌臣面黑而短性恭謹每與人語向前一步一拜
國無城郭彌諾王所居屋之中大柱雕刻為文飾以金
銀彌臣王以木柵居海際水中以石獅子為屋四足仍
以板蓋悉用香木百姓皆樓居披婆羅籠男女多好音
樂樓兩頭置鼓飲酒即擊鼓男子攜手樓中蹈舞為樂
在蠻永昌城西南六十日程大和九年曾破其國刮金

銀擄其族三二千人配麗水淘金

驃國在蠻永昌城南七十五日程閣羅鳳所通也其國用銀錢以青磚為圓城周行一日程百姓盡在城內有十二門當國王所居門前有一大像露坐高百餘尺白如霜雪俗尚廉恥人性和善少言重佛法城中並無宰殺又多推步天文若有兩相訴訟者王即令焚香向大像思惟其非便各引退其或有災疫及不安穩之事王亦焚香對大像悔過自責男子多衣白氎婦人當頂為高髻以金銀真珠為飾著青婆羅裙又披羅段行必持扇貴家婦皆三人五人在傍持扇有移信使到蠻界河

賧則以江猪白氎及琉璃罌為貿易

案罌原本作盟貿易原本作加今從

新唐書驃國傳改正

與波斯及婆羅門鄰接西去舍利城二十日

程據佛經舍利城中天竺國也近城有沙山不生草木

恆河經云沙山中過然則驃國疑東天竺也蠻賊大和

六年劫掠驃國虜其眾三千餘人隸配柘東令之自給

今子孫亦食魚蟲之類是其種末也咸通四年正月六

日寅時有一胡僧裸形手持一仗束白絹進退為步在

安南羅城南面本使蔡襲當時以弓飛箭當胸中此設

法胡僧眾蠻扶昇歸營幕城內將士無不鼓譟

崑崙國正北去蠻界西洱河八十一日程出青木香檀

香紫檀香檳榔琉璃水精蠶坯等諸香藥珍寶犀牛等
蠻賊會將軍馬攻之被崑崙國開路放進軍後鑿其路
通江決水淹浸進退無計餓死者萬餘不死者崑崙去
其右腕放回

大秦婆羅門國界永昌北與彌諾國江西正東

案此句疑有脫

誤安西城樓接界東去蠻陽苴咩城四十日程蠻王善

之街來其國

案此八字文不相屬疑有脫誤

小婆羅門與驃國及彌臣國接界在永昌北七十四日

程俗不食牛肉預知身後事出見齒螭越諾

案此句未詳共

大耳國往來蠻夷善之信共國

案此七字又亦不屬

夜半國在蠻界蒼望城東北隔麗水城其部落婦人唯
與鬼通能知吉凶禍福本土君長崇信蠻夷往往以金
購之要知善惡

昆明牂牁界接麗水相近蠻賊曾攻不得至今銜恨之

昆明牂牁本使臣蔡襲嘗奏請分布軍馬從黔府路入

案此條之首當有脫文

女王國去蠻界鎮南節度三十餘日程其國去驩州一

十日程往往與驩州百姓交易蠻賊曾將二萬人伐其

國被女王藥箭射之十不存一蠻賊迺回

水真蠟國陸真蠟國與蠻鎮南相接蠻賊曾領馬軍到

海畔見蒼波汹涌悵然收軍卻回案此篇乃載南蠻接壤之國自此以下皆別說他事蓋附錄之文傳寫失其標目耳今各低一格以別之

咸通四年六月六日蠻賊四千餘人草賊朱道古下

二千人共棹小船數百隻收郡州案通鑑攷異引唐實錄以郡州為交

州補國史亦同是得安南都押衙張慶宗杜存陵武

安州刺史陳行餘案新唐書地理志武安州屬安南都護府以航舶戰船

十餘隻築損蠻賊船三十來隻沈溺臣九月二十一

日於藤州見安南虞候史孝慤并得兵馬使徐崇雅

信蠻賊不解水悉皆溺死吐蕃鐵橋節度本屬吐蕃

貞元十年蒙異牟尋攻破今並屬蠻管案吐蕃鐵橋節度以下二

十五字文義與上文不相屬疑亦他處錯簡在此

異牟尋曾詐臣事吐蕃吐蕃遂封異牟江尋西卑賤

案以下皆紀冊封南詔之事此二十字文不相屬蓋所紀冊封一事佚其前段而此條佚其後段耳今不

可考姑仍其舊因遣曹長段南羅各同倫判官趙伽寬等九

人與南詔清平官尹輔會及親信李羅札將大馬二

十匹迎子弟羽儀六人沿路視事十五日至安南城

城使段伽諾出步軍二百隊馬軍一百隊夾道排立

帶甲馬六十隊引前步槍五百人隨後去城五十里

迎候十九日到曲驛鎮使楊盛出馬軍一百三十隊

步軍一百七十隊夾道排立帶甲馬二百人引前步

槍三百人隨後去驛一十里迎接二十一日過吹舍
川首領父老百餘人蠻夷百姓數千人路傍羅列而
拜馬上送酒雲南節度將五十匹馬來迎二十三日
到雲南城節度蒙會物出馬軍一百隊步軍三百人
夾道排立帶甲馬一十隊引前步槍五百人隨後去
城一十里迎候門前父老二百餘人吐蕃封王數人
在路迎拜是日南詔使大軍將兼戶曹長王各苴來
迎二十四日到白崖城城使尹瑳出馬軍一百隊步
軍二百隊夾路排立引馬六十匹步槍五百人去城
五里迎候南詔遣大軍將李鳳嵐將細馬一千匹并

伎樂來迎渠斂道中路客館館前父老二百餘人蠻
夷百姓五六十人路迎馬前大軍將喻于儉出馬步
軍三百隊夾路排立引馬六十匹步槍三百人去城
五里迎候南詔妹李波羅諾將細馬一十匹來迎入
龍尾城客館南詔異牟尋叔父阿思將大馬二百匹
來迎二十六日過大和城南詔異牟尋從父兄蒙細
羅勿案羅勿原本作四勾今據新唐書改正及清平官李異傍大軍將
李千傍等將細馬六十匹來迎皆金鍍玉珂拂髦振
鐸案振原本作根今據新唐書改正夾路馬步軍排隊二十餘里南
詔蒙異牟尋出陽苴畔城五里迎先飾大象一十二

頭引前以次馬軍隊以次伎樂隊以次子弟持斧鉞
南詔異牟尋衣金甲披大蟲皮執雙鐸男蒙閣勸在
傍步槍千餘人隨後馬上祇揖而退原曰授冊原貞

元十年十月二十七日陽苴咩城具儀注設位旌節
當庭東西特立南詔異牟尋及清平官已下各具儀

禮面北序立宣慰南詔使東向立冊立南詔使南向

立宣勅書讀冊文訖案此條冊字原本俱訛作開今據文改正相者引南

詔蒙異牟尋離位授冊次受貞元十年歷日南詔及
清平官已下稽顙再拜手舞足蹈慶退而言牟尋曾

祖父開元中冊雲南王祖父天寶中又蒙冊襲雲南

王自隔大國向五十年貞元中皇帝聖明念錄微効
今又賜禮命復覩漢儀對揚天休實感心肺其日樓
下大會又坐上割牲用銀平脫馬頭盤二面牟尋曰

此是天寶初先人任鴻臚少卿宿衛時案衛上原脫宿字今補入

開元皇帝所賜比寶藏不敢用得至今又伎樂中有
老人吹笛婦人唱歌各年近七十餘牟尋指之曰先

人歸蕃來國開元皇帝賜胡部及龜茲音聲各兩部

今死亡零落盡只餘此二人在國酒旣行牟尋自捧

杯擎跪勸讓冊立使袁滋引杯醴酒曰南詔當深思

祖宗緒業堅守誠信為西南藩屏使後嗣有以傳繼

也異牟尋噓嘻曰敢不承命其年十一月七日事畢發陽苴咩城雲南王蒙異牟尋以清平官尹輔酋十

七人奉表謝恩進納吐蕃贊普鍾印一面案通鑑吐蕃謂弟為

鍾南詔服吐蕃時封為贊普鍾日東王並獻鐸鞘浪川劍生金瑟瑟牛

黃琥珀白氎紡絲象牙犀角越睽馬統備甲馬并甲

文金皆方土所貴之物也仍令大軍將王各苴柘東

副使杜伽諾具牛羊領鞍馬及丁夫三百人提荷食

物其年十一月二十四日送至石門從石門更十日

程到茂州自後南蠻移心向化遂與吐蕃讎隙

伏緣數年之間當州鎮釐革南詔入朝人數縱有經

過者郵傳殘薄兼緣安南大中年

案原本作大中年今據唐書及通鑑

宜宗大中年十三年杜棕為西川節度使奏請節減南蠻習學子弟及入貢廉從人數南詔怒自是頗擾邊境書中所說當指此事牟字蓋年字之訛謹改正奏請隔絕南詔往來通好

謹按尚書云撫我則后虐我則讎本使蔡襲去年正

月十四日內四度中矢石家口并元隨七十餘人悉

殞於賊所臣長男韜及奴婢一十四口並陷蠻陬臣

夙夜憂憶本使蔡襲行坐痛心切以蠻賊尚據安南

今江源并諸州各自固守其首領將吏去年春夏頻

請救兵自是海門案安南既陷以海門鎮為行交州不與發遣并不

給與戈甲弓弩致令蠻賊侵掠州軍臣以南蠻從古

及今凡虜掠諸處百姓夷獠隸他處則貴江源首領
已下知其配隸之事固惜副卿必合戮力齊心共禦
蠻夷之殘暴

案臣以下五十一字文義未詳且不相屬當有脫誤

又黔涇巴夏四邑苗衆咸通三年春三月八日因入

賊朱道古營柵竟日與蠻賊將大羌楊阿觸楊酋盛

柘東判官楊忠義話得姓名立邊城自爲一國之由

祖乃盤瓠之後其蠻賊楊羌等云綻盤古之後

案綻字有

訛此時緣單車問罪莫能若事

案若字有訛

咸通五年六

月左授夔州都督府長史問蠻夷巴夏四邑根源悉

以錄之寄安南諸大首領詳錄於此爲蠻志一十卷

事庶知南蠻首末之序

案以下六條又附錄中旁及之文今再低一格以別之

謹按後漢南蠻傳昔高辛氏有戎寇吳將軍爲患

其侵暴乃下勅曰有人得戎寇吳將軍頭者賜金

百鎰封邑萬家妻以少女時帝有犬名盤瓠後遂

之寇所因嚙得吳將軍頭來其寇遂平帝大喜因

以官爵賚賜犬不起帝少女聞之奏曰皇帝信不

可失深憂犬之爲患帝曰當殺之女曰殺有功之

犬失天下之信矣帝曰善乎因請匹之帝不得已

乃以配盤瓠盤瓠得女負入南山處於石室其處

險阻不通人跡後生十二子六男六女自相匹偶

緝草木皮以爲衣服帝賜以南山仍起高欄爲居
止之其後滋蔓自爲一國

案此文與今後漢書南蠻傳不同按王

通明廣異記云高辛時人家生一犬初如小特主
怪之棄於道下七日不死禽獸乳之其形繼日而
大主人復收之當初棄道下之時以盤瓠葉覆之
因以爲瑞遂獻於帝以盤瓠爲名也後立功嚙得
戎寇吳將軍頭帝妻以公主封盤瓠爲定邊侯公
主分媿七塊肉割之有七男長大各認一姓今巴
東姓田雷再向蒙旻叔孫氏也其後苗裔熾盛從
黔南逾昆湘高麗之地自爲一國幽王爲犬戎所

殺卽其後也盤瓠皮骨今見在黔中田雷等家時
祀之

巴中有大宗廩君之後也漢書巴郡本有四姓巴
氏繁氏陳氏鄭氏皆出於武落鍾離山其山黑赤
二穴巴氏之子生於赤穴繁陳鄭三姓生於黑穴
未有君長俱事鬼乃共擲劍於石穴約能中者奉
以爲君巴氏子務相獨中之又令乘土船下夷水
到鹽陽約能浮者爲君務相獨浮因立務相爲君
也遂有神女謂廩君曰此地廣大魚鹽所出請爲
畱之廩君不許神女暮來取宿晨則化爲飛蟲羣

蔽日月天地晦冥積十餘日廩君伺其便射之天
乃開朗廩君方定居於夷水三姓皆臣事之廩君
死魂魄化爲白虎及惠王并巴蜀以巴夷爲蠻夷
君尚女其人有罪得以爵除出賦二千一十六百
萬錢三歲一出義賦一千八百錢人出幪布八丈
二尺雞羽三十鍬也案此文與今後漢書南郡蠻傳稍有異同
巴氏祭其祖擊鼓而祭白虎之後也按華陽國志
秦昭王時白虎爲害多傷人乃購之曰有殺得白
虎者封邑千家繼以金帛於是胸忍夷廖仲藥等
以竹弩射之中而死秦遂刻石爲夷人立盟曰夷

人頃田不租十妻不算傷人不論秦犯夷輸黃龍

一雙夷犯秦輸清酒一鍾夷人遂因號虎夷一名

弦頭剛勇頗有先人之風

案所引華陽國志與今本文稍不同

按秦紀始皇十八年巴郡出大人長二十五丈一
夫兩妻號曰左右也是故左思蜀都賦云剛勇生
其方風謠尚其武

按夔城圖經云夷事道蠻事鬼初喪擊鼓以爲道
哀其歌必號其衆必跳此乃盤瓠白虎之勇也俗
傳正月初夜鳴鼓連腰以歌爲踏蹠之戲五月十
五日招命騎健畫楫圖舟十船同角千人齊聲唱

鼓扣舷沿江騰波而下俗三月八日爲大節以陳
祠享振鐸擊鼓師舞爲敬也

夷蠻居山谷

蠻卽蠻之別名

巴夏居城郭與中土風俗禮

樂不同

雲南詔蒙異牟尋與中國誓文臣今錄白進獻

貞元十年歲次甲戌正月乙亥五月己卯雲南詔異
牟尋及清平官大軍將與劍南西川節度使崔佐時

案崔佐時乃韋臯所遣西川節度巡官不可直稱節度使疑有脫文謹詣玷蒼山北上

請天地水三官五嶽四瀆及管川谷諸神靈同請降
臨永爲證據念異牟尋乃祖乃父忠赤附漢去天寶

九載被姚川都督張乾陁等離間部落因此與漢阻
絕經今四十三年與吐蕃洽和爲兄弟之國吐蕃贊
普冊牟尋爲日東王亦無二心亦無二志去貞元四
年奉劍南節度使韋臯僕射書具陳漢皇帝聖明懷
柔好生之德七年又蒙遣使段忠義等招諭兼送皇
帝勅書遂與清平官大軍將大首領等密圖大計誠
矢天地發於禎祥所管部落誓心如一去年四月十
三日差趙莫羅眉揚大和眉等賫僕射來書三路獻
表願歸清化誓爲漢臣啟告宗祖明神鑒照忠款今
再蒙皇帝蒙劍南西川節度使韋臯僕射遣巡官崔

佐時傳語牟尋等契誠誓無遷變謹請西洱河玷蒼
山神祠監盟牟尋與清平官洪驃利時大軍將段盛
等請全部落歸附漢朝山河兩利卽願牟尋清平官
大軍將等福祚無疆子孫昌盛不絕管諸賧首領永
無離二興兵動衆討伐吐蕃無不尅捷如會盟之後
發起二心及與吐蕃私相會合或輒窺侵漢界內田
地卽願天地神祇共降災罰宗祠殄滅部落不安災
疾臻湊人戶流散稼穡產畜悉皆減耗如蒙漢與通
和之後有起異心窺圖牟尋所管疆土侵害百姓致
使部落不安及有患難不賜救卹亦請准此誓文神

祇共罰如蒙大漢和通之後更無異意卽願大漢國
祚長久福盛子孫天下清平永保無疆之祚漢使崔
佐時至益州不爲牟尋陳說及節度使不爲奏聞牟
尋赤心歸國之意亦願神祇降之災今牟尋率衆官
具牢醴到西洱河奏請山川土地靈祇請漢使計會
發動兵馬同心戮力共行討伐然土蕃神川崑崙會
同已來不假天兵牟尋盡收復鐵橋爲界歸漢舊疆
宇謹率羣官虔誠盟誓共尅金契永爲誓信其誓文
一本請劍南節度隨表進獻一本藏於神室一本投
西洱河一本牟尋畱詔城內府庫貽誠子孫伏惟山

川神祇同鑒誠懇

某年六月二十一日奏狀今謹錄白獻進

案後題貞元十年奏

狀而此闕其年亦刊削不盡之文

東蠻和使楊傳盛等六月十八日到安南齊蠻王蒙異牟尋與臣絹書一封并金鏤合子一具合子有緜有當歸有硃砂有金石東蠻國王是故雲南詔王閣羅鳳孫姓蒙名異牟尋遣前件使齋表詣闕於今月十八日到兼得其王牟尋與臣書遠陳誠懇并金鏤合子一枚其使味言送合子中有緜者以表柔服不敢更與為生梗有當歸者永願為內屬有硃砂者蓋

獻丹心向闕有金者言歸義之意如金之堅

又言蠻王蒙異牟尋積代唐臣徧霑皇化天寶年中其祖閣羅鳳被邊將張乾陀讒搆部落驚懼遂違聖化北向歸投吐蕃贊普以贊普年少信任讒佞欲併其國蒙尋遠懷聖化北向請命故遣和使乞釋前罪願與部落竭誠歸附緣道遐阻伏恐和使不達故三道遣一道出石山從戎州路入一道出牂牁從黔府路入一道出夷獠從安南路入其楊傳盛等今年四月十九日從蠻王蒙異牟尋所理大和城發六月十八日到安南府其和使楊傳盛年老染瘴瘡未得進

發臣見醫療候獲稍損卽差專使領赴闕庭其使云
異牟尋自祖父久背國恩今者願棄豺狼之思歸聖
人之德此皆陛下雨露之澤及外夷故蠻徼遐荒願
爲內屬臣忝領蕃鎮目覩昇平踴躍忻歡倍萬常幸
右蠻王與臣書及金鏤合子等謹差十將李茂等隨
表奉進謹奏貞元十年六月二十一日安南都護充
管內節度觀察處置等使檢校工部尚書御史大夫
臣趙昌奏狀

貞元十年南詔蒙異牟尋請歸附聖唐願充內屬盟
立誓言永爲西南藩屏臣今於安南郡州溪源首領

耆老處借得故蠻王蒙異牟尋誓文一本安南都護
趙昌貞元十年奏狀白一本伏以故南詔蒙異牟尋
嗣孫惠龍不守祖父畱訓旣違盟誓自掇禍殃尚未
悛心猶恣狂暴全驅蟻聚之衆攻刦邕交之人五載
興兵三來虜掠顧生靈之何負受塗炭之苦辛臣去
年正月二十九日已錄蠻界程途及山川城鎮六詔
始末諸種名數風俗條教土宜物產六驗名號連接
諸蕃共纂錄成十卷於安南郡州江口附襄州節度
押衙張守忠進獻今臣謹錄故蠻王蒙異牟尋貞元
十年誓文及趙昌奏狀白隨表奉進以上

續書卷第十



